

‘Na carrittata di poesii

Cuminciavu cu lu picca e sugnu juntu
ca ‘un sacciu unni mettili.
Ormai ‘nn’haiu accucchiatu assà,
su ‘na carrittata di poesii.
Mi piaci leggili e rileggili, nun sulu
chiddi me, ma puru chiddi di l’atri.

Mi piaci puru rigalalli
a cunuscenti, amici e parenti,
vogliu fari capiri can ‘un basta
sulu manciari e dòrmiri,
cci voli puru ‘na liggiuta,
accussì la jurnata nun passa muta.

Quann’era nicu
li scrivia pi li fimmineddi,
pi la natura, pi lu mari,
pi la luna, pi ‘na rosa,
li scrivia pi ogni cosa ca mi dava
un trimulì, ‘n’emozzioni, un batticori.

Ora ‘nveci,
mi piaci scìviri
pi dari emozzioni all’atri.
Cu leggi, s’avà sèntiri
dintrà la poesia
chissà è lu veru me piaciri.

Scriviri e lèggiri poesii ‘nsicilianu
è ‘mpurtanti pi ‘sti picciutteddi d’ora,
pi nun cci fari scurdari la nostra lingua
e fàricci ricurdari chiddu chi facivanu
li nostri nonni e catanonni e sèntisi
urgugliusi d’èssiri siciliani.

Di ‘sta carrittata di poesii,
li vogliu dari a nichì e granni,
a li nichì pi nun si scurdari lu sicilianu,
a li granni pi leggiricilli manu-manu.

2013 Giuseppe Cardella